

**Fâble de Djyan da Fountanna
Adaptachyon de Narcisse Prâ**

I dzenëla di cocon ën ö

Derën a dzenelirî, ömo é i fèna avouètson a dzenëla qu'ët énnâ chô o dzöquye.

- I fèna *(ën pachin da man chô o cosson da dzenëla)* Cot, cot, cot, cot, cot.... Brâa dzenëla! Törna à pyë à noje féire oun noé cocon ën ö ! Cot, cot, cot, cot, tû t'ëi frantsamin i melœûja de töte é dzenële da tèra ! Töte é chenanne tû noje fé oun cocon ën ö ! Che dejècho chin ëntor de no, nyoun me créirey ! Oun cocon ën ö pë chenanna ! Mà dèquye no farin chin te? Èn ën? T'ëi prœu oûna töta brâa dzenëla. N'in prœu à mindjyë, é noûtro meynâ chon bien vetey, no manquin de rin èr meymon !
- Ömo Oun pourey dère que no chin de pouro rëtso. Û bën de rësto pouro ?
- I fèna Ni pouro ni rëtso. À me chin me djûe bien dînche.
- Ömo Mà d'aprêi te, Grîta, coume tû èsplique chin : oûna dzenëla que fé de cocon ën ö ?
- I fèna Yo brëtso pâ chamînte à comprîndre. É dînche, é dînche. Voualà. É coume ch'ëmperonâ po chaey podèquye é cherijyë bâlon de cheriëje é i vîgna de rejën. I noûtra dzenëla fé töte é chenanne oun cocon ën ö. É dînche é voualà. Fô pâ bretchyë méi yuîn.
- Ömo D'aprêi me sta bitchye, i càtse oun trajö derën èstoûma. É che no troîn ché trajö, moujâ-ey Grîta, no vëndran rëtso to d'oun cou! No pouran batî oûna meymon po tsacoun di noûtro meynâ é partî ën vacànse à Tahiti! Û bën p'éj île d'Hawaï!
- I fèna Mà dèquye tû oudrey féire bâ pe Tahiti? T'ëi pâ méi prœu dzin po apedâ é dzînte vahiné! Por me i vouâ bien dînche. Avouë oun cocon ën ö pe chenanna no manquin de rin ! Ni no, ni é noûtro méynâ.

(Ömo prin o gro cœuté é apële a dzenële. I dzenële che më à teryë de cotcotcotcotcotcot)

- Ömo Dèquye a di ? tû, tû comprin o ingâdzo de sta bitchye...
- I fèna A di : "Choplé féire pâ chin! Atramin vo pèdre to."
- Ömo A di chin, à couja qu'a pouïra de mûrî. Û bën po vouardâ to por yey. Ét à couja de chin noje bâle rin qu'oun cocon pe chenanna, po noje tinî d'à plan ! I che di qu'ën atindin yey pû proféytchyë dû chyô trajö rin que por yey. *(i dzenëla ëncharvadjyëta che më à teryë de cotcotcotcotcot...de protèstachyon)* Dèquye di sta crouéi bitchye ?
- I fèna A di de demandâ à te che t'îre inû fou.
- Ömo Fou û bën pâ fou, yo vouéi véire ché trajö que y a derën à chavoua bôla ! *(d'oun cou de cœuté, i tchouë a dzenëla que âche aâ bâ a tîta é éj âe)*
- I fèna *(ën éproîn de retenî a man que tën o cœuté)* Nà choplé, Toûgno, fé pâ chin ! À chocô !

(Ömo ouvouë a bôla da dzenëla é chöbre to dechoubetâ)

I fèna Tö, éh bèn t'a yû chi cou, Toûgno! Y a rin que de boudàla derën a bôla da noûtra dzenëla di cocon ën ö ! Rin que de boudàla !

Ömo Orà cho pouète câ arey moujà. Ën efë, y a rin que de boudàla coûme po tôte é dzenëla !

I fèna Éh bèn chi cou t'a gagnà gro ! Ën plàche d'inî rëtso to d'oun cou, t'úi bon po tornâ à apiyë tchuî é matën o chatson d'écoûa, avouë créyon rëdzo, ploûma, gôma é plumyé é chupörtâ hlë crouè, que chon inû timin aéyno o dzo de ouey, coûme éj âtro pouïro rejan é rejante ! É can tû charéi apréi ën t'ëngrëndjyë avouë chi-chi, avouë sta-chi, tû moujeréi apréi é byô cocon ën ö da noûtra dzenëla ! I màma à no dejej à tchuî é chyô méynâ : « Déan que de voje mariâ, mafyâ-vo de hlœu é de hlë que vouan inî rëtso to d'oun cou ! Chon de moûndo qu'an pâ a tîta chû éj etchyèble, mà énâ derën é nyôe û bèn énâ ch'a oûna ! » É yo éi firû djyustamin chû youn de hlë tabèrlo !

Ömo Bon pouète dînche, deman matën me fô tornâ à prîndre a vey d'écoûa, é me troâ déan hlëj agnë, éje chuportâ, é complemintâ é parin, é cho é chin....Me fodrë ître matinî, éi rin de prèsto...

I fèna Ouà, tû vouâ te dessonâ djûsto can i noûtra dzenëla fajey o chyô cocon ën ö !

Ömo Mà tû deréi pâ vîa à nyoun chin qu'úi fey yo ouey, atramin pâcho po oun quërtën !

I fèna I problèmo é pâ qu'i moûndo moujèche que t'úi oun quërtën. I problèmo é que t'úi oun quërtën. Toutoun, chéi pâ foûa yo ! Vouàjo pâ dzacatâ vîa que n'aéchën oûna dzenëla que fajey tôte é chenanne oun cocon ën ö. Charan capâblo de noje reclamâ dej impô à coûja de hlë cocon ën ö.